

20 SEP 2002

MAHATHIR-BELANJAWAN LEAD

PM UMUM STRATEGI SERAMPANG EMPAT MATA RANGSANG EKONOMI DALAM BELANJAWAN 2003

KUALA LUMPUR, 20 Sept (Bernama) -- Datuk Seri Dr Mahathir Mohamad hari ini mengumumkan strategi serampang empat mata dalam Belanjawan 2003 yang bertujuan mempertingkatkan lagi potensi pertumbuhan dinamis ekonomi Malaysia dalam menghadapi suasana persaingan yang sengit di luar negara.

Dalam belanjawan yang tidak mengandungi cadangan-cadangan bagi kenaikan cukai, Perdana Menteri, yang juga Menteri Kewangan, sebaliknya mengumumkan beberapa galakan untuk mempertingkatkan lagi daya saingan sektor swasta dan memupuk kecemerlangan yang lebih tinggi dalam perkhidmatan awam.

Yang paling utama ialah cadangan-cadangan untuk mengurangkan kos menjalankan perniagaan di negara ini dan memberikan galakan bagi sektor-sektor ekonomi ini agar mereka dapat memanfaatkan potensi mereka sepenuhnya.

"Saya tidak bercadang untuk menaikkan atau mengenakan sebarang cukai baru. Namun, demi memastikan kerajaan mempunyai sumber kewangan yang mencukupi untuk menampung perbelanjaan, usaha akan dipergiatkan lagi bagi meningkatkan pematuhan bayaran cukai," katanya ketika membentangkan Belanjawan 2003 di Dewan Rakyat, di sini.

Perdana Menteri, mengumumkan bahawa ekonomi Malaysia akan tumbuh pada kadar yang menggalakkan iaitu sebanyak 6.0 hingga 6.5 peratus tahun depan, berkata bahawa Belanjawan RM109.8 bilion yang dicadangkan bagi tahun 2003 itu merupakan peningkatan sebanyak 9.2 peratus berbanding peruntukan asal pada tahun 2002. Daripada jumlah ini, sebanyak RM72.84 bilion adalah bagi perbelanjaan mengurus dan RM36.96 bilion bagi perbelanjaan pembangunan.

Dengan pendapatan yang dianggarkan berjumlah RM89.79 bilion, akaun keseluruhan kerajaan persekutuan dijangka mencatat defisit sebanyak 3.9 peratus daripada keluaran dalam negara kasar (KDNK), iaitu lebih rendah daripada 4.7 peratus pada tahun 2002.

Dalam ucapan yang mengambil masa lebih daripada dua jam itu, Dr Mahathir juga membawa berita gembira kepada hampir sejuta kakitangan awam di seluruh negara apabila beliau mengumumkan bahawa mereka akan menerima bonus sebulan gaji atau sekurang-kurangnya RM1,200 kerana usaha keras dan dedikasi mereka.

Belanjawan 2003 menumpukan kepada empat strategi:

Pertama: Meningkatkan pelaburan domestik dalam semua sektor dengan potensi pertumbuhan;

Kedua: Mengenal pasti dan menerokai bidang niche dalam sektor-sektor perkhidmatan, pertanian dan pembuatan;

Ketiga: Memperkukuhkan kewangan sektor awam dan mempertingkatkan kecekapan kakitangan awam; dan

Keempat: Memupuk masyarakat yang progresif dan harmoni dengan nilai moral yang tinggi dan menjamin kesejahteraan rakyat, terutamanya di kawasan-kawasan luar bandar.

Sambil menyifatkan Belanjawan 2003 sebagai "mesra rakyat", Dr Mahathir juga menyeru supaya dilaksanakan anjakan paradigma dalam pengurusan ekonomi negara kerana ia terlalu bergantung kepada pembangunan sektor luaran, pelaburan langsung asing dan perdagangan antarabangsa sejak berpuluh tahun lamanya, serta menegaskan bahawa pertumbuhan mestilah didorong oleh faktor dalam negeri dan dijana oleh sumber-sumber dan pelaburan dalam negara.

Perdana Menteri menggesa rakyat Malaysia mencontohi China dan Korea Selatan dalam menyusun strategi sektor industri. Beliau juga menggesa sektor swasta di negara ini memainkan peranan sebagai penjana utama

pertumbuhan ekonomi kerana kerajaan tidak boleh terus melaksanakan dasar-dasar fiskal mengembang.

Dalam usaha untuk menggalakkan industri kecil dan sederhana (IKS), Dr Mahathir mencadangkan supaya cukai korporat IKS yang modal berbayarnya berjumlah RM2.5 juta diturunkan kepada 20 peratus ke atas pendapatan yang boleh dikenakan cukai sehingga RM100,000 daripada 28 peratus sekarang. Langkah ini akan menyebabkan kerajaan kehilangan pendapatan sebanyak kira-kira RM270 juta.

Belanjawan 2003 juga mengandungi beberapa galakan bagi membantu syarikat mengurangkan kos mengendalikan perniagaan bagi mempertingkatkan daya saingan negara dan ini juga meliputi ahli-ahli perniagaan yang beroperasi di Malaysia.

Contohnya, bukan pemastautin tidak lagi dikenakan cukai ke atas pendapatan yang diterima bagi perkhidmatan yang diberikan di luar negara manakala peraturan-peraturan Kastam akan dipermudah dan diseragamkan bagi mempercepatkan pergerakan barangan.

Sebagai rangsangan bagi para pegneksport Malaysia, Dr Mahathir juga mengumumkan pemberian hadiah khas bagi pengeksport-pengeksport baik di mana mereka boleh mendapat pengecualian cukai ke atas cukai pendapatan bagi 30 peratus daripada pertambahan eksport manakala mereka yang menembusi pasaran-pasaran baru akan diberikan pengecualian cukai pendapatan sebanyak 50 peratus.

Mengenai mempertingkatkan wawasan kerajaan mengujudkan Masyarakat Perdagangan dan Perindustrian Bumiputera, kata beliau nilai kontrak setiap kelas kontrak kerajaan bagi kontraktor-kontraktor bumiputera akan dinaikkan kepada di antara RM200,000 dan RM15 juta setiap satu daripada RM100,000 hingga RM4 juta setiap satu sekarang.

Kerajaan, katanya, telah tidak mengkaji semula kadar sejak tahun 1970-an.

Bagaimanapun, katanya kerajaan juga akan lebih berhati-hati dalam memberikan kontrak-kontrak kerana terdapat segelintir yang menjual kontrak mereka untuk memperolehi untung cepat. Kontrak-kontraktor itu kini akan disenarai hitamkan.

Mengenai pembangunan luar bandar dan meningkatkan pendapatan pekerja-pekerja kilang, para peladang dan nelayan di kawasan-kawasan luar bandar, Dr Mahathir berkata kerajaan akan memperkenalkan konsep "Satu Kampung Satu Industri" yang membabitkan pembangunan industri-industri kecil yang perlukan di antara 10 dan 100 pekerja setiap satu.

Kampung-kampung di pedalaman akan dirancang semula untuk mempunyai kedai-kedai runcit dan kedai kopi dan juga kilang-kilang kecil yang boleh mengeluarkan keluaran-keluaran yang boleh dipasarkan.

Dr Mahathir juga berkata bahawa pembangunan tanah yang selari dengan Felda tidak berdaya maju lagi.

Perdana Menteri juga mengumumkan perancangan untuk menjadikan pertanian sebagai enjin pertumbuhan ketiga dan berkata kerajaan akan terus meningkatkan pelaburan dalam aktiviti pertanian komersil.

Untuk menggaklakkan penyatuan dan pengurusan kebun-kebun kecil, katanya pengurangan cukai bersamaan dengan jumlah pelaburan akan diberikan kepada sesebuah syarikat yang melabur dalam anak syarikat yang membabitkan penyatuan pengurusan kebun-kebun kecil dan tanah terbiar.

Anak syarikat yang melaksakana pengurusan seumpama itu akan juga dikecualikan daripada cukai perkhidmatan.

Galakan-galakan cukai juga turun diumumkan bagi syarikat-syarikat perladangan bukan getah yang membekalkan kayu getah untuk industri perabot, syarikat-syarikat mengeluarkan dan memproses makanan, dan menternak ayam dan itik.

Galakan-galakan juga akan diberikan kepada syarikat-syarikat dalam

sektor pembuatan yang melaksanakan aktiviti-aktiviti nilai tinggi dan syarikat-syarikat yang berpindah kepada aktiviti-aktiviti berasaskan pengetahuan.

Tabung-tabung khas juga akan ditubuhkan untuk membantu syarikat-syarikat meluaskan dan mempercepatkan aktiviti mereka dalam sektor-sektor pelancongan dan teknologi maklumat dan komunikasi.

Dr Mahathir turut mengumumkan galakan-galakan bagi syarikat-syarikat asing yang menubuhkan pusat-pusat pengedaran kawasan dan ibu pejabat operasi di Malaysia.

Mengenai pasaran modal secara Islam, katanay kerajaan akan menggalakkan penerbitan sekuriti hutang swasta (PDS) secara Islam berasaskan kepada prinsip-prinsip mudharabah, musyarakah dan ijarah dan juga menarik pelabur-pelabur, terutamanya dari Asia Barat. Di bawah cadangan kerajaan itu, perbelanjaan yang ditanggung ke atas penerbitan PDS Islam akan dibenarkan sebagai potongan bagi tujuan cukai pendapatan bagi lima tahun bermula daripada tahun depan.

Dr Mahathir turut membidas institusi-institusi kewangan yang haya mencari untung yang gagal dalam tanggung jawab mereka sebagai pemberi pinjaman.

Beliau memberi amaran bahawa kedegilan mereka mungkin memaksa kerajaan mencari alternatif bagi memastikan pembiayaan yang mencukupi bagi para pelabur dan ia mungkin terpaksa menaikkan nisbah rizab berkanun bagi institusi-institusi perbankan. -- BERNAMA

MAM SHY OS